

Te uira⁹ waewae kei o matua
 Kei a Waikirinui, kei a Tohe-matanui,¹⁰
 Kia homai ana nga rakau¹¹ o tawhiti;
 Ohorere pu te mauri, tangi ana te paoro,
 Whakahoro atu ana ki roto o Wainaea.¹²
 Kaore he pouri, mei hinga ana koe
 Ki te aroaro ra o te manu¹³ toheroa,
 E tohu ana, e tama, he papanga kei raro;
 Ko Te Tua-o-te-rangi¹⁴ naku i tu awatea
 Nga tai e whati i waho i Otaki.
 Tena e 'Raha¹⁵ ta taua pokai kura,
 Whitikitia mai kia mau te pupuri.
 Ehara ko te mea i kawea ai koe,
 Ko te poroauahi¹⁶ nei, mehe aha te huanga?
 Mitimiti kau ana te arero, kapekape kau ana
 Ka hoki mai ki ahau ra.

Tenei o nui naku i moumou,
 Ka whiua te uira, ka maka nga kape,
 Ka whiua Te Wewehi,¹⁷ ka mahue iho nei
 Ko Mounganui¹⁸ ra; o nui, e tama,
 I haere ai koe na.

¹Te Ohonga: He mokopuna na Rore, mona te tangi nei; ko Te Aro-karaka tetahi o ona ingoa.

²Aro: Ko Te Aro-karaka ara, ko Te Ohonga.

³Te Rangimaio: Ko Io.

⁴Ngarueiterangi: He atua.

⁵Tokoahu: Ko te tama a Rore.

⁶Taku: Ko Te Kohai-a-Taku, he kurae kei te taha tonga o Waitahanui.
 Ko te moenga o Te Roro-o-te-rangi.

⁷Te Waitapu: Kei Motutere, he wai tapu, he tuahu no mua.

⁸Rangitikei: Ko te awa, ko te takiwa o Rangitikei.

⁹Te uira waewae: Mo te ahua o te tapuae o nga ope whawhai.

¹⁰Tohe-matanui: Ko Te Whatanui pea?

¹¹Nga rakau o tawhiti: He pu.

¹²Waimea: Kei te taha tonga o Manawatu.

¹³Manu toheroa: Mo te pakanga.

¹⁴Te Tuaoterangi: He toa na Ngati-Awa i mate ki Te Pakakutu, kei te taha ki waho o Otaki.

¹⁵'Raha: Te Rauparaha.

¹⁶Poroauahi: I whakaritea te wahine korako ra ki te torori.

¹⁷Te Wewehi: He tiki, a he patu.

¹⁸Mounganui: He tiki.

192.—HE TANGI MO TE KOHIKA, Na Tikina (Ngati-Tuwharetoa).

Na Te Taite Te Tomo nga kupu, nga whakamarama

I tangihia e Tikina ki Raropo, i Hauhungaroa, i te taha hauauru o Taupo. Ko Te Kohika tenei nana te waiata nama 112. Ko Te Kohika tenei e korerotia ra i te waiata nama 9, i te 173; i moe i a Te Rerehau, nana te waiata nama 42.